

Otvaranje džamije Ferhadije ključno za pomirenje i toleranciju u Bosni i Hercegovini i šire

Visoki predstavnik Valentin Inzko boravit će u Banjaluci danas i sutra, 6. i 7. maja, kako bi prisustvovao svečanom otvaranju džamije Ferhadije.

„Sutra će prelijepa džamija Ferhadija u Banjaluci, koja je bila uništena u ratu zajedno s ostalih 15 džamija u ovom gradu, ponovo biti otvorena. Ovo će biti događaj sa većim značenjem za pomirenje i toleranciju u ovom regionu i šire, i veoma poseban trenutak ne samo za Banjaluku nego i za čovječanstvo u cjelini“, rekao je visoki predstavnik.

U toku ove posjete, visoki predstavnik Inzko će se također sastati sa banjalučkim muftijom Osmanom Kozlićem i biskupom Franjom Komaricom. On će na ovim sastancima podvući značaj procesa pomirenja i povratka. Naglasit će da se izbjeglicama i raseljenim osobama mora omogućiti da se vrate svojim domovima u sigurnosti, bez rizika od uznemiravanja, zastrašivanja, proganjanja ili diskriminacije.

To praktično znači osiguranje radnih mjesta, obrazovanja i zdravstvene zaštite u cilju olakšanja povratka. Jednako tako važan je i dijalog i bolje razumijevanje između zajednica u cilju promoviranja koncepta tolerancije i pomirenja. Vjerske zajednice treba da budu na čelu ovih napora, vjeruje visoki predstavnik.

U okviru posjete Banjaluci, visoki predstavnik će također obilježiti i pravoslavni praznik Đurđevdan tako što će se pridružiti jednoj porodici u Banjaluci u njihovom slavlju.